

閩  
中  
金  
石  
志

閩中金石志卷六

嘉興馮登府輯

吳興劉承幹校

宋

義井石刻

建隆二年

仙遊縣志義井亦名七星井乾隆丙子掘地得石刻  
二其形左凹而右凸一曰建隆二年辛酉十一月十  
日洵砌縣尹翁處厚丞尉王永裕主簿陳仁雋一刻  
姓名者大曰仙關陳釁銑林恪李全泰函谷陳蒲蔡  
賢李蔡

按翁處厚莆田人建隆間知仙遊王永裕陳仁雋

一  
古樓刊  
邨志失載

保福寺石觀音像記

建隆三年

三山志建隆三年造像有記刻石云寺雖新號山則故名蓋古閩山也

建善寺碑

建隆四年

三山志在溫麻縣背洪嶺之北面黃河之南所謂安遠里自唐析溫麻爲長溪景雲二年遂移建寺在縣城東改號建善寺碑云邑旣遷來寺亦隨至建極四年威武軍節度館驛巡官儒林郎吳慎辭撰碑銘按建極紀元所無輿地碑目作建隆四年吳謹辭

撰在長溪按慎作謹避宋諱字改也節度使館驛  
巡官郝志姓氏失攷

永春縣記

開寶二年

輿地碑目開寶二年立又有江公望多暇亭記刻於  
碑陰

按公望紹聖四年宰永春其題多暇亭詩云作吏  
如兼隱爲儒也解禪了然無箇事安坐自調弦見  
輿地紀勝

甘泉院記

開寶七年

三山志雪峯僧守稠卓庵施水里人剏此院開寶七

年張正字克儉記刻石前西塔下云平險道以利人行施義泉而資渴者

接在長樂縣

甘棠院記

開寶九年

輿地碑目在福州治錢氏有土曰錢昱爲太守作記  
開寶七年

案三山志引錢昱甘棠院記云甲戌三月予始叨  
岳牧至十九年乃作甘棠院按開寶止九年甲戌  
歲乃七年也三山志所引恐有誤十九年當作九  
年輿地紀勝甘棠院在福州治開寶九年錢昱創

此得其實矣碑目又作七年誤

大華嚴寺疏

開寶九年

三山志支提萬壽院錢氏起廢爲寺號大華嚴有開  
寶九年十一月天下大元帥吳越國錢俶慶寺疏刻  
石今存疏云口口口中爰舍金帛命口口口口  
功成藻繪事就謹舍銅金帛三百八十七千八百一  
十丈建道場一會修設五千僧功德慶讚兼舍本州  
鐵金帛二千繩充長生供給常住又差靈隱寺副寺  
主辦隆爲寺主數年挂意今日召工云云

重建瑯琊王廟碑

開寶九年

在福州慶城寺東閩王廟開寶九年三月建福州刺史彭城錢昱撰文攝閩縣丞將仕郎試太子校書林操書

若夫非常之人必有非常之事者衆所聞矣其或功及于國道濟於民生居茅土及饗廟食者求諸前史罕有其倫是以黃石立祠皆因遺迹汚陽致祭竄表舊功故聖人之制也法施於民則祀之以勞定國則祀之苟無所稱實曰誣祭公名審知字詳卿姓王氏本瑯琊人秦相翦三十四代孫高祖曷唐貞元中爲光州定城宰有善政以及民因遷家於是邦遂世爲

固始人曾祖友贈光祿卿王父蘊玉贈秘書少監父  
恁累贈至太尉光州刺史公卽太尉季子形質魁秀  
機辨明敏負英雄之氣者必相交友學韜鈴之畧者  
咸詢智謀縣知五典之書暗合萬人之敵遠近服其  
義勇鄰里推其孝弟嘗有善相詣公之門視其昆弟  
三人曰富壽皆一體也而季常位極人臣自是公竊  
負之尋遇陟帖興悲在原軫念恭事孟仲嚴若父焉  
乾符末鯨網全踈鳬毛盡落磨牙吮血中原正苦於  
傷殘脫來裂裳四海盡疲於征戰公蓄慷慨之氣負  
縱橫之才每或撫髀暗驚彎弧自誓曰大丈夫不能

安民濟物豈勞虛生乎於是豪俠相許寢食不忘雖  
大鵬未飛已具垂天之勢而神馬一躍終同追電之  
踪屬王緒者兇巢寇之戈矛盜霍邱之土宇遽言得  
志遂啓無厭但思於弱吐強吞豈顧其幸災樂禍因  
乃大掠部屬士民以廣隊伍於是公之昆季咸與焉  
及秦宗權竊弄五兵逼侵四境緒內乏嬰城之計外  
無善鄰之助遂率衆以作竄欲避地而偷安玉石俱  
焚孰能分別豺狼當路無匪縱橫幸豫章懦怯之中  
偶番禺受害之後凡經藩翰靡或支吾自潮陽抵漳  
浦百姓畏其兇戾五馬避其鋒刃豈知兵忌不戢人

慎無恒狙蒲騷者終至敗亡好草竊者焉能長久動  
蓄自疑之志轉乖同義之心適當軍衆不賓遂爲部  
下所害公素敦誠信累涉艱危既負出羣之才仍諳  
武庫之術且兵不可以無主將不可以失人衆遂推  
公而立之公居下惟謙事上必順雖輿情之有屬在  
公論以不忘乃曰予蚤事二兄常若嚴訓豈有弟爲  
大將兄居其下者乎遂奉長兄潮以帥其衆乃獲清  
源爲所理之地公用之惡道路之多梗憤貢賦之不  
通實欲致理一方尅平羣盜外維征繕中則經營運  
籌之勝負預知攬轡之澄清可待兵馬使范暉奪符

甲以自尊奉題絨而不遜恣行誅戮同事綏懷人既  
類于倒懸時合當于逆取公比緣觀釁因得微詞遂  
舉勤王之師以伸弔民之義躬事戈甲身臨矢石范  
暉扁舟欲遯疎網難逃遂爲海人梟首以獻公既殲  
元惡乃布優恩凡日脅從悉令宥過用仁信以御下  
行慈惠以卹民曾未浹旬已聞致理百姓愛之如父  
母三軍畏之如神明遂迎長兄潮遷理是郡復請仲  
兄審邽迭居舊邦武肅王表率諸侯蕩平大憝吳越  
盡歸於賜履江淮咸奉以專征以其能務忠勤遠求  
薦擢遂奏授本道廉察及泉州符印偕命焉尋朝廷

以寰海挺災久勞我武東南靖亂獲庇吾民俾提旄  
鉞之權口口襦袴之惠遂升本州爲威武軍授潮節  
度觀察處置等使仍以公爲節度副使獎勲績也洎  
元晁殂謝衆庶歸依公乃躬受遺言式俟朝命明年  
春帝恩遠降人欲是從初授公檢校刑部尙書威武  
軍節度兵馬副大使將委什連之任攸居貳職之勞  
一之日訓習驍雄二之日蘇息疲瘵用心數月善政  
聞天於是進端揆之資正元戎之位齋壇高築軍幕  
大開分州司屏翰之權握從口鼓鼙之任未幾顯居  
使相特錫戶封方隆推轂之寄尤藉東鉤之力當多

難未弭聊同指臂之相須及其瞻有歸實賴股肱之  
別用式資補袞俾重褰帷天復元年載正乾綱重光  
帝座言念七閩之地實符八柱之功特頒渥恩用越  
倫等賜武庫戟十二枝列於私門非恒例也自是日  
鍾百祿歲奉九遷公致君愈勤述職無怠萬里輸貢  
川陸不繫其踪一心尊戴風雨不改其志昭皇累嘉  
忠節別錫異數欲酬懋德豈限彝章天祐元年夏四  
月封鄆王食實封一百戶尋虜龍蛇起陸戎馬生  
郊人心不厭於石唐天命已歸於新室公知微不爽  
居器同欺梁祖之卽位也纔傾推解之恩繼舉疇敷

之典三公互拜萬戶連封呂尚帝師之尊官榮既極  
子儀中令之貴考限惟同尋復進封閩王加福州大  
都督長史迨莊宗之建王業也神州克復寓縣咸寧  
欲敦柔遠之心先下念功之詔遂增并賦仍改功臣  
式覃北闕之恩用倚南門之寄公方推拱極既效安  
邊惟治民素屬於優勤而得疾遽從於綿篤百齡無  
效五福先全以同光三年十二月十二日薨於正寢  
享年六十有四朝廷素欽盡節俄覽遺文既增慙老  
之悲豈慳錫終之典冊贈尚書令謚曰忠懿禮也公  
生當離亂之運出值艱難之秋割據一方蓄養百姓

得深溝高壘之固有披堅執銳之衆贈水陸之產通  
南北之商鑄銅於蜀山積粟於洛口者不足言其富  
也連臨淄之袂接滌河之簞者不足言其庶也至若  
外面大度內用小心慎刑既及於精詳舉事悉從於  
簡畧犯則不赦令比秋霜之嚴恩本無私惠如冬日  
之煖民惟道化吏以法繩此可以稱善爲政矣言必  
皆信行罔自欺非正詞不入於聰非公事不宣於口  
居嘗無聲色之樂平生以禮義自守念十家之產者  
躬行節儉懷五子之歌者心誠荒唐每當燦石之威  
未嘗操扇綫屬鷄鳴之後早見嚴裝以德報恩遠逾

萬里至誠感物動契百神此可以稱善立身矣興崇  
儒道好尙文藝建學校以訓誨設厨饌以供給於時  
兵革之後庠序皆亾獨振古風鬱更舊俗豈須齊魯  
之變自成洙泗之鄉此得以稱善教化矣懷尊賢之  
志宏愛客之道四方名士萬里咸來至有蓬瀛謫仙  
鴛鴦舊侶或因官而忘返者或假途而惜去者盡赴  
築金之禮皆歸簪帽之行其餘草澤菟羅魚車待遇  
者固不可勝記此得以稱善招納矣尊天事地奉道  
饗神無非克誠足以監德然而素欽釋典大廓法門  
衆善皆臻何德不報無漏上智苾蒭散布於諸方作

有良因伽藍遍滿於樂國煉郎山之堅固鑄六丈金  
身銘麗水之光輝寫五千秘藏事非爲己願乃庇民  
此得以稱善求福矣功惟理亂志在盡忠安不忌危  
常爲持險之戒小當事大罔違與國之道以至覆盂  
數郡高枕三邊雖昆彭致霸之傳未能繼踵在佗燮  
自尊之患固不同風此得以稱善守位矣且天惟祐  
德民本懷仁公饗富貴者三十年傳冊封者四五世  
遺愛銘於人口忠節書於國史臣子之盛不亦大乎  
迨茲陵谷變遷箕裘廢墜寂寞闕以時之薦淒涼同  
乏嗣之悲士農工商慕舊政以如在潢汙蘋藻望遺

廟以如存丙午歲我師恤鄰閩境禱化遇今大元帥  
吳越國王位鍾歷紐運偶負圖常保大之功之初行  
興滅繼絕之義既克寧於民庶思咸悅於鬼神每念  
閩川所歸本由王氏而盛雖子孫異代已同薰燼之  
香而春秋二時宜陳籩豆之禮遂命以公舊第爲忠  
懿王廟仍參常祀之數霸主爰修於廢祭藩侯遂立  
於叢祠竹馬戟枝尙存故物豚肩尊酒早薦惟馨望  
山庭月角之容立偕老于飛之像庭廡未同於工續  
槐植旋改於光陰舊徑難尋已絕羅含之蘭菊重門  
長閉但多仲蔚之蓬蒿既乖與祭之儀殊缺致誠之

所大宋開寶七年秋九月大元帥吳越國王以時和  
年豐家給人足俾答福謙之祐遂申成秩之典凡曰  
祠廟毀廢悉出錢帛修完乃命衙直將躬授人工旁  
搽材植補遺基而皆備易舊物以咸新曾不踰時已  
云告畢奢儉得以中度規制得以合禮朱軒粉壁隨  
晚霽以生光修竹喬松向寒霜而吐色挺曹筆則陰  
兵欲動關郢工則神馬將嘶步從悉周精靈如在矧  
以故鄉將吏開幕賓僚當其草昧干戈屢經勞苦洎  
自樹立基構盡享崇高乃塑都押衙建州刺史孟威  
等二十六人以配享焉斯廟也前瞰清流右連淨刹

一路自無有塵雜四鄰皆屬於幽奇曉霧纔開先露  
列宿之岫踈鐘雖近不驚繞樹之禽公昔也嘗遊宴  
於斯今也復祠祭於此始易宅而爲廟矧將廢而能  
興苟非陰德不衰令名未朽又豈能身歿之後有如  
此之盛乎昱叨居是藩獲畢斯事仰嘉猷之未遠聽  
遺愛以長新爰屬短裁庶存實錄燕然叙事雖有謝  
於孟堅岷首感人亦未多於叔子乃爲銘曰極天曰  
嶽惟嶽有神蓄是英氣生是異人干霄利劍瑞世祥  
麟爰當季運實庇蒸民唐德將衰羣雄欲出陰霧垂  
地秋氛蔽日豺豕猖獗萑蒲縱逸苟非偉才焉濟王

室權爲巨盜緒亦朋姦欲亂中夏首屠光山誰謂英  
傑同罹險艱終口寘跡能無厚顏爰率部民同徂萬  
里緒爲衆惡公得衆美因戮兇人遂奉君子立功著  
名自此而始漳浦旣寧清源復平遂以政事授於難  
兄孝實至性謙惟直誠靜乃揖讓亂則經營憤彼閩  
州拊茲禪將苛虐漸篤政刑俱喪銳旅大驅凱歌連  
唱克定一方式諸衆望始參貳職已播列勛屏翰之  
美朝廷脩間迨居重鎮繼事明君盡忠竭節松茂蘭  
華假仰大藩廢席五郡雖曰功庸亦由時運二柄齊  
舉七德兼訓令子令孫當年振奮真王重望上相清

規陵谷雖變馨香不衰俯緣甲第遂立嚴祠年禋展  
易邊豆或虧霸王推恩良時有待舊廟克新遺蹤不  
改與爾金碧儼然神彩靈貺芳名千秋如在

案宋開寶七年吳越國王以審知舊第爲忠懿王  
廟搏王象及孟威等二十六人像以配享碑所謂  
始易宅而爲廟也孟威十國春秋作孟成是誤文  
碑傳王薨於同光三年十二月十二日路振九國  
志薛五代史皆以爲元年並誤福州府志以爲五  
月五日卒是日罷節事相沿至今則以三年夏五  
月王寢疾相涉而誤惟逆厯圖作同光三年卒與

碑合錢昱以開寶七年爲福州刺史至太平興國二年去任見三山志秩官表林操志失考

銅牌 太平興國間

閩書宋太平興國間惠安令崔某移古縣于今縣開基得銅牌志云太平興國間古縣移惠安若逢崔知縣送我上青山牌陰云開我基者立惠安葬我身者祀青山崔令遂送銅牌青山立廟祀之牌明初尙存島夷人寇以爲金載歸船尋沒

按太平興國惠安令郝志失考

江縣重陂東湖記 淳化二年

鞠仲謀撰在連江

縣之北野古號東湖潴水五百年溉田四萬畝民食之源也按圖經云隋開皇十三年肇興此塘厥後民豪擅利塘半爲田唐咸通初劉君達宰邑義不容姦道先濟物訴於上國盡復舊基察地形則仙掌前傾觀山勢則雲屏後擁牢籠一曲列大樹而固隄防控扼九溪設斗門而通溝洫苟非清德疇啟永圖故得劉君塑像以懷仁李令刊碑而濟美今上大中建極海內同文三推之禮勤農百穀之豐爲瑞有賢能而皆舉無惠利而不興奈何廢我泉源害我稼穡始姦

生於小利終弊在於上游狐鼠相依絲桐莫化弗除  
民害難報國恩伸謀方忝字人未知爲政前歲老民  
李牙等狀於本道今下興工遂舉衆心旋徵工手僉  
曰木斗門易壞琢石代之雄雌山立壯基構也架以  
橋梁覆以亭宇通往來也開設溝渠交橫左右疏源  
流也外造散橋六所便牛羊也小創斗門七所限要  
津也沿塘栽柳成隄虞內侵也又約劉公石刻李令  
木椿取西大石柱月字之中畫一水則防後姦也劉  
公祠廟增飾經營廣遺愛也成功次年再刊刻獎微  
勞也至若春田入耒秋稼連雲旱寇爲災陽烏熾景

懸門未發局靈雨於東湖嚴鑰纔開走雷霆於駭浪  
莫不環流高下支派東西一朝減尺寸之深七里救  
枯焦之困自此歲多大稔家給餘糧雖霑霈應祈桔  
槔廣用不能過也仲謀素慙公器益謝人文欲示編  
昨敢從實錄亦冀謳歌行路宣導皇風信口變於無  
虞協棟隆而不朽淳化二年十月吉日

按仲謀字有開景德二十四賢中人端拱二年知  
連江興東湖水利邑民德之見八閩通志此碑卽  
述其事劉達郝志有傳李令李辰也

福州東華宮泰山廟記

淳化四年

節度掌書記監察御史裴詢撰

案節度掌書記宋沿唐制或設或不設無定制郝

志職官失考

古田縣廟學記

景德二年

李堪撰在古田

按林譜閩中記開元間都督李亞邱以逋民劉疆  
輩向化立邑當環峯複嶂間平陸二十五里版垣  
墉高丈許步三百周樹室闢戶張官置吏先是田  
畷鉏耨敷蓄爲厥疆畎因著之名右挾建溪則州  
城實東南面也立鄉四而建東首焉次恩惠次元

和次青田總里一十三曰保安曰和平曰瀨溪者  
建東有之曰橫溪新興洛陽慕仁者恩惠有之曰  
邵南安民者元和有之曰長安安樂順委者青田  
有之統戶一萬二千九百七十七主客參焉官公  
舍五十五間不堪碎腐者少半繕完之謀萌矣初  
有令尉主簿詔以尉兼焉萑苻椎埋之事尉不得  
專必聽於令官是以貳員也繇元宗朝起而爲縣  
垂二百六十七載去闕庭不啻五千里秩用千石  
或五百石至二百石第以五等百里制之故遣一  
令長補一佐職奈所來多烏紗之苦所往非冰清

之懿重以王審知復暴突其國唯嗜慾於浮居氏  
暨淫現妖言極綺藻瑰覩之姿致訛黔首破業養  
子叛親愛走空門口朋左道夥可踰髮興國初歸  
皇朝徙縣於西南之三舍曰水口就津陸之要利  
以官政能否民理枉直提督而易至從轉運使楊  
克讓請也博陵嗣其職受寵詭胥復還今所既深  
入巖壑皇華朱輪無復過抵諸所不法刺舉漏焉  
予下車視事見一月獄禁人合三百四十八至一  
歲不知其幾治之簿書戶八百四十三脫籍丁一  
千九百遺賦土六百五十畝失租賦之詞牒勿辯

黑白於是身教告部下一切除之榛坵莽阜聽其  
請商授焉或以之廬或以之粒闢沃衍五千五百  
四十三畝雉佛宮灰淫祠爲之學凡躡履贏糧游  
藝就館者有通達經旨分明章句每釋奠日講尙  
書毛詩及左氏國語黃卷雍雍振衣肅肅口想之  
風庶幾焉又從而立壇二壇社壇稷廩一春秋祭  
祀畢以譙高年領秀民歌豐年房四以容祭器屋  
六以列陪位廡三以致獻官其有未能行者望後  
之人繼其終也於是博孝悌之勸播墳史之訓紆  
侵漁之慮清者揚之驕者抑之不給者與之已仆

者舉之井閭宴然刻石碑之後之爲廟廊之策者  
其味斯言景德二年九月九日

案李堪字仲任常州人咸平二年進士景德間  
知古田務本愛民建學社毀淫祠暇集諸生討  
論政理治化翕然見黃志

合沙門石橋記

景德四年

林洪範撰在福州

按洪範閩縣人有文才累舉不第教授門弟子以  
終著諸經義方見萬姓統譜

同清縣廟學記

大中祥符二年

邑令史溫撰

按溫大中祥符間爲同清令建學立社設市井置

射場多所善政嚴辟疆一見知其才常自作記志  
之見郝志

閩清縣始置社稷壇記

大中祥符

邑令史溫撰

懷安縣廟學記

大中祥符四年

主簿陸東撰

按郝志懷安縣主簿陸東失考

天寶山石刻

大中祥符七年

閩書在龍溪天寶山宋大中祥符七年三月龍溪民  
網得魚得珠以獻郡守王冕冕列表以進其詞曰臣  
聞皇猷光塞天乃効祥聖德升聞地不藏寶前件珠  
得非蛇口產異蚌胎有感必通自生煙潭之內無脛

而至忽居寶肆之中瑩煌外散於月華皎潔內含於  
星彩此蓋皇帝陛下齊莊奉道清淨化民體乾極而  
握符致坤靈而薦瑞遐稽信史迥殊照乘之光洞究  
祥經忽類媚川之色臣握蘭郎署剖竹侯封幸逢江  
海之珍願繼梯航之貢于闕內庭原缺真宗賜勅曰省  
所進珠良合盛事具悉汝方布詔條克修貢職偉此  
媚川之寶發爲還浦之祥可配美於鳳庭比分輝於  
龍燭勤順斯著嘉美兼深秋冷汝輩好否遣書指不  
多及冕遂立石公廨左刻表并勅其上 按冕大中  
祥符間任漳州府

梨嶽廟碑

大中祥符八年

廟祀唐刺史李頻宋盧幹立碑郝志在延平府城東南

按建安志云廟在建安縣十五里初祥符八年郡守盧幹立碑謂神乃唐宰相王回紹興五年運司鄭士秀又立碑爲神當爲李頻容齋續筆建安有梨山廟相傳爲唐李刺史李回洪邁守建日讀唐藝文李頻傳云懿宗時爲建州刺史乃証其爲頻也洪爲作碑記之王象之紀勝曰邁以淳熙七年爲守在鄭士秀之後則改李回爲李頻乃鄭士秀

非始于邁也閩書云建安縣有梨山

郝志作黎山有梨

山廟唐李頻刺州時雅好此山及卒父老葬之永

洛州

郝志作永樂川

既卽此山立廟此皆言建安之祠宋

周弼有建寧浦城李頻行祠詩浦城縣志夢筆山

等覺寺旁舊有唐刺史李頻行祠此周弼詩所據

也又考唐書頻傳盜發頻冢壽昌人爲之掩覆則

頻葬在壽昌永洛州殆衣冠之藏耳碑在建安縣

十五里郝志謂盧幹立碑在延平府東亦未詳年

月皆失攷也

閩清縣梅川廟記

天聖五年

邑令邵寶撰

按郝志閩清令邵寶失攷

惠安靈光院記

天聖八年

輿地碑目天聖八年蔡襄撰

按忠惠集無此記

重修甘棠院記

天聖中

邑令陳說之撰在福州

按說之絳子莆田人天聖八年進士終秘書丞

黟澹院留題

天聖

輿地碑目在劍浦妙峯閣上有蔡襄題字及李孝彥  
草書賈詩云溪聲灘外急草色雨中深客意無南

北山光自古今

郝志在延平府東十里宋天聖中郡守劉滋募南平  
縣志作蔡襄書滋字潤之崇安人天聖中知南劍州  
見郝志

勝果院記

天聖

輿地碑目在建寧天聖中章得象記

按章得象浦城人字希言頻從子咸平五年進士  
天聖中在相位八年

連江縣永定院建殿記

景祐三年

陳彝撰

漳州開元寺景祐鐘款

景祐四年

款云當寺洪鐘一口唐大曆十三年所鑄已邁二百

五十載爰自明道元年壬申太歲已經蝕壤收萃元  
銅州府聞奏于朝廷三司牒准于勅命許重鑄造丁  
丑厥功爾乃高八尺三寸廣五尺洪梁將掛于蒲牢  
擊朴上資於帝祚勝緣將獲用紀年華時景祐四年  
丁丑歲三月甲辰朔十五日戊子謹題後紀太守方  
慎從等姓名

按慎從字惟之慎言弟景祐二年進士曾知漳州

箋經臺

景祐四年

三山志在懷安縣北龍山祥符四年僧可度即院之  
北臺箋楞嚴經景祐四年夏英公疏記其事

五通廟記

康定元年

進士方岳文在福州

按舊志康定選舉無攷

長泰縣常平倉記

慶曆三年

唐堯欽撰

夫民生三代而下其命之制於天也豈不信哉余壯歲登朝祇役四方今老矣大都見郡邑之爲政者工簿書飾厨傳暇則葺樓亭與神祠蓋若此者多矣至於民生大命爲事創始之難而潤澤之尤不易也夫漢唐之常平國家之預備其制一也談常平者曰宜

當社不宜郡邑蓋雖朱子亦爲是云余曰非也有司而賢乎將薄海利弊盡知之何有於封域之內如猶未也置珠桂之品於荒野僻谷之處弊始盛爾且夫自昔爲常平者散也取二分之息斂也與正賦俱徵國家預脩雖其貴放賤糴者同而以贖緩不以息錢者異則寬於民者又厚矣而行之卒不效何也余以爲邑有繁簡而緩因之上官督促太密郡邑罄俸資以贍安所得糴本其或有糴本矣緩民糶而急私橐不爲糴則倉雖存而穀無也弊一穀價與時貴賤役人倚市爲奸本賤也而貴估之未荒也而賤散之不

者民餓於途粟腐於倉知其入不知其出則穀雖存而濟寡矣弊二常平專脩賑饑取於民者還以予民也有如藉法行私名爲公糴實充宅用給散之際聽憑書吏得粟盡衙役與其近郭能自達者貧民不沾侖合之惠則簿書雖具而不平甚矣弊三昔者趙閱道在越州前民未饑先問民能自食有幾當廩於官有幾庫錢倉粟可發有幾富民可募出粟有幾余以爲今郡邑宜倣此意先於保甲中審識上戶中戶上貧中貧與夫忠實可用之人臨時委用給賑先窮鄉而後近郭先上貧而後中貧不以公廩供私用不以

無事緩蓄積荒歲減價而糶頻年挨陳而支夫然後  
法行而無弊制盡而可久是惟公復倉爲民之意後  
之人見其行之果有效而緩急救助計者拱手熟視  
不出一力問之云三代漢唐之法其宜於昔者今皆  
極弊不可復乾溢卒至民號呼以死則又誘曰天實  
爲之繇今觀之天耶人耶其果不可復抑未有以復  
之者耶余謂行之而得其人處之而有其法藉令出  
於秦皇漢武之制調停補葺不幸有急猶能有救而  
況常平義倉雖其義肇於漢唐諸臣實祖周人委積  
遺意朱子社倉倣而行之亦既有效孰謂其不可復

哉秦故漳舊邑也常平倉自昔未有復者復之自今  
郡理龍公始邑侯盧君一日造余曰秦廣袤十不當  
旁邑之三秦賦額三足當旁邑之七民詩書耒耜賭  
且盜爾無所資什一之利故秦所需於倉視旁邑尤  
亟昔者龍公至今而民曰爾賭爾盜爾賊而助我有  
藉其亟更而業無擾我耕讀不者死閔而城曰是女  
墻低圯守望何藉其亟築訓而兵曰是將定反側充  
差捕而不之省何兵之爲其亟增已而思歲有饑穰  
何儲蓄之有詢故老有城隍故址先讓置而輟曰是  
足供吾事修而蓋藏環而牆柵定而鍍金買而穀石

邑之薦紳與民有力者佐之厥鑰東西充然盈牝顏  
其扁曰常平蓋公蒞泰不兩月而蠹民者衛民者食  
民者次第興除常平又其利之博者願一言以彰公  
之明唐子堯欽曰夫以泰之民之將衽席於君之澤  
也以公之異於世之爲政者也以欽不佞之獲附一  
言與公不朽也藉侯不命猶將勉爲之况有侯之命  
在旣叙次其語則復再拜稽首而言曰天下法之果  
可復也將又有繼此而起者矣如其議之者曰吾嘗  
復之云爾繼之者曰吾嘗記之云爾則今日之常平  
猶之昔日之預備也國家預備之建徧天下豈獨少

一常平而已乎其斯惟公與侯之責朱子行之建州復請于朝頒之天下當日實惟劉汝愚父子左右其間亦嘗病世鮮其人而感嘆于所遭之不易今幸世有如公與侯慨然有志制命之道苟其生同斯世而不勉焉共成斯政蔽民也其斯惟鄉人士君子之責公名文明永新人侯名洪遠東陽人倉建於慶厯辛卯四月又二年欽爲之記

按修復常平一事可入名宦郡守龍文明長泰令  
盧洪遠志皆未載

姜相峰 慶厯四年

在南安縣九日山西唐姜公輔謫官來泉居此歿後  
葬焉慶厯四年蘇紳大書姜相峯三字刻於石

按紳字儀父同安人天禧三年進士厯官龍圖學  
士集賢修撰姜相貞元末謫爲別駕既歿秦系爲  
葬九日山下

福州廟學記

慶厯六年

邵守蔡襄撰并書

七閩濱海其地險而壯福州之治尤據其勝勢爲東  
南一都會其風俗尊嚮儒術唐之支盛間有重人薰  
漬劇刈日以滋衆然庠校之興前無著者自五代錢

吳越王制專甄治

一作治

分子弟以莅之乃作新宮號

爲使學本朝太平興國中轉運使楊公克讓始立孔子廟以奠春秋景祐四年通判謝君微權郡治遂表建州學仍請賜田五頃以久衆處詔書起下謝達罷去逮范公亢許公宗壽更守此邦參擇曹掾之能者黃中方嶠繼任其事商工度材厯五載而大備公格之泉計費千萬植宇之楹總數六十中繪孔子與其徒高弟者十人像又繪六十子及先儒以業傳于世者皆傳之壁曰九經閣以藏舊所賜書曰三禮堂以圖輿服之制祭享之器費舍齋廬旁翼兩序庭次井

飲百用資給今尙書都官員外郎沈公之來入而拜  
出而歎曰學成空不居無以育賢才而起風化乃與  
監都太常博士陳君議增美田充所賜數迎舊儒敷  
解經術又立比業準程羣居約束揭爲衆則以侯官  
尉吳及兼總之于是遠近學者靡然從慕初公至精  
究疾弊繩治强豪人用震栗隱而譬曉士民教之六  
藝以是知公摧兇桡而培養本威一此下有與字惠並施有  
所歸賴更曰膳道厲戒幼小無或失業咸願刻文于  
石垂延久後遂相與來請襄爲記已又作詩曰於戲  
生民角翼者羣上聖有作才治人文執道之中立世

之紀厥後迷謬乖離本始躬服儒方偶嬖言詞專用  
於神乃文之疵入齒王官出知法令不失有罪乃政  
之病然于當時咸著能名使二者失山學弗明學斯  
謂何忠義悌孝政斯謂何禮讓風教譬如大鼎量入  
于鐘侖石百數罔不兼容在學於政先其大者言詞  
法令進修之假唯州有學邦君寔謀駟汝憫民來處  
來遊象圖嚴嚴記書整整衣冠肅雍室廬閎靜孰爲  
人父救戒而子往焉問問弗往攸恥孰爲人師啟率  
其徒開陳統緒罷詘巧誣墜廢興厲于以繼承益完  
弗圯惟賢者能

按范亢景祐間知福州許宗壽寶元間知福州方  
嶠任福州司理參軍沈公當卽沈邈康定初任吳  
友任侯官尉並見郝志通判謝微志失攷

善溪廟記

慶厯六年

文學范宗暉撰在福州

才翁鼓山題名

慶厯六年

篆書才翁丙戌季夏遊

按蘇舜元字才翁桐山人時爲福建提刑觀察使

太平聖惠方序碑

慶厯六年

蔡襄撰

生者天地之德成者聖人之業運化流物隨之不遺  
生之之理至矣推本眞治安而有倫成之之道著矣  
是故作天下之美利者其聖人之事乎傳稱神農味  
百草黃帝錄內經以除民疾其術能死者生天者壽  
以言乎功雖大禹之䟽澤水驅龍蛇湯武之用金革  
戡禍亂特救患於一時孰與無窮之賴乎故曰作天  
下之美利者皆聖人之事也宋當天命出九州之人  
于火鼎之中吹之濯之太宗皇帝平一或作宇內極  
所覆之廣又時其氣息而大蘇之乃詔官償金緡之  
科賄集古今名方與藥石診視之法國醫詮次類分

百卷號曰太平聖惠方詔頒州郡傳於吏民然州郡承之大率嚴管鑰謹曝涼而已吏民莫得與其利焉  
閩俗左醫右巫疾家依巫索崇而過醫之門十纔二三故醫之傳甚少余治州之明年議錄舊所賜書以示於衆郡人何希彭者通方伎之學凡聖惠方有異域瓌怪難致之物及一作若食金石草木得不死之篇一皆置之其便于民用者得方六千九十六希彭謹溷自守爲鄉閭所信因取其本謄載于版列牙門之左右所以導聖主無窮之澤淪究于下又曉人以依坐之謬使之歸經常之道亦刺史之要職也慶厯六

年十二月右正言直史館知事蔡襄序

按通志在福州府堂右宋慶厯六年建蔡襄書

邵去華等鼓山題名

慶厯六年

邵去華蘇才翁郭世濟蔡君謨慶厯丙戌孟秋八日  
遊靈源洞正書

榕陰新檢題名洞石楷書徑二尺筆畫端重効魯公  
體大勝洛陽橋記鼓山題刻宋代爲盛而書法古雅  
絕倫以君謨爲第一又書忘歸石三字國師巖三字  
於靈源洞左徑三尺許皆奇品也

按郭承規字世濟時官福建提刑君謨時知福州

邵去華鼓山題名

慶厯六年

慶厯丙戌秋邵去華宿鼓山寺正書刻靈源洞

按邵錫字去華時爲福建提刑觀察使

黃子光等鼓山題名

慶厯六年

黃子光劉仲達許景山黃子容劉漢臣慶厯丙戌九月二十二日遊靈源洞正書刻將軍石左

董淵等鼓山題名

慶厯八年

董淵吳元卿慶厯戊子春同來篆書刻靈源洞對巖

按董淵時知長樂縣

大邵督府門記

慶厯八年

潮陽從事邱濬撰在福州

按濬字思道建安人精於歷數絕意仕進仁宗時  
詔除萬年縣主簿不赴碑偁潮陽從事蓋幕官也

隆道侯廟記

慶歷八年

鄉貢進士翁定基撰駐泊都監楊永慶刻石在福州

乘風堂記

慶歷八年

輿地碑目在建寧北苑鳳凰山高處有石鐫爲碣字  
大尺許端勁有體蓋慶歷戊子柯適記

名勝志東坡序畧云北苑龍焙如翔鳳下飲之狀山  
最高處有乘風堂堂側壁石碣字大尺許

按柯適永福人嘉定七年進士任漳州通判

十詩石刻

慶厯

三山志廣巖高千仞慶厯間邑人黃非熊養高其中  
訪得奇所作十詩留于石玉泉洞瑞松塢鐘磬石聽  
泉厓瀑布厓龍樹巖靈羊谷龍尾泉望化臺清源洞  
也

按非熊莆田人

述江縣顯應廟記

慶厯

潘奎撰

甘露亭

慶厯

閩書在長樂瑞峰中有石曰釣鰲亭曰垂露宋慶厯  
中觀察使蘇舜元勒字于石字作垂露體故以名亭

閩中金石志卷六終

閩中金石志卷七

嘉興馮登府輯

吳興劉承幹校

宋

達夫巖石刻

皇祐二年

圖書在同安大輪山三字書絕壁上邑令莫兼字也  
旁書皇祐庚寅季夏乙酉莫兼達夫張士宗元卿黃  
宗曾希聖陳綜總之薛穎士之林林鑄成之錢城子  
重宋溥君覃楊久中景嘗遊興教寺北巖院越明日  
王儀子正至諸君並一時賢者傾蓋於是故紀其盛  
焉以令字名巖

按邑令莫兼政和間任同安縣

茶錄

皇祐三年

蔡襄著上下篇論並書嵌甌甯縣學壁間

福州府志作皇祐三年蔡襄書懷安令樊紀刊行

按紀寶慶初任懷安縣

劉後村集余所見茶錄凡數本暮年乃見絹本豈非  
自喜此作亦如右軍之於禊帖屢書不一書乎公吏  
事尤高發奸摘伏如神而掌書吏輒竊公藏稿不加  
罪亦不窮治意此吏有蕭翼之癖與其他作奸犯科  
者不同耶可發千古一笑淳祐壬子十月望日克莊

書時年六十有六

陳鑑集名碑藪宋人無工楷法者忠惠茶錄出入晉唐間絕構也此本刻於宋大同彼時已稱不易得余又於友人處見一本結構稍懈大不及此此本後有黃文獻手跋云蔡君謨小楷茶錄結體似顏平原張景隆刻之汴京又有墨本入紹興煥章閣摸勒禁中無八分題序字勢飄逸頗具晉人風軌此搨是也今皆不傳恐當日所書不止一二或別有真蹟旦暮遇之亦未可知耳至正三年佛日黃潛記

徐勣跋蔡君謨茶錄石刻小楷爲平生得意書劉后

村去君謨未遠家有數本而其一爲方氏得之不啻  
重寶珍貴如此況五百載之後乎斯刻自君謨時置  
之建州治爲土掩瘞不知年歲近重修府藏掘地得  
之守識其古物洗刷仍置庫舍後附刻茶詩六首字  
稍大于茶錄亦稍缺蝕勸聞其石在公署無從印搨  
萬厯丁酉屠田叔爲閩轉運副使乃托田叔移書建  
州守索之才得此本守令去今復棄置無有貴重之  
者惜哉

萬安渡石橋碑

皇祐五年

輿地碑目莆陽蔡襄記并書

郝志在泉州迎恩門東二十里宋皇祐五年蔡襄爲  
守建此橋並書碑以紀寥寥百十餘言文簡而書法  
精絕爲古今寶今橋側爲襄祠二石立祠中

泉州萬安渡石橋始造於皇祐五年四月庚寅以嘉  
祐四年十二月辛未訖功蔡趾于淵醴水爲四十七  
道梁空以行其長三千六百尺廣丈有五尺翼以扶  
欄如其長之數而兩之靡金錢一千四百萬求諸施  
者渡寶支海去舟而徒易危而安民莫不利職其事  
者盧錫王實許忠浮圖義波宗善等十五人旣成太  
守莆陽蔡襄爲之合樂讌飲而落之明年秋蒙 召

遷京道由是出因紀所作勒於岸左

閩書是橋也坦夷如官道可三里餘揚州廿四空懸  
月夜吳江飛渡僅表虹垂兼以忠惠記文書筆益精  
千古于是好事竟傳橋異謂橋未與時深不可趾忠  
惠爲檄使隸投之海若而告之隸嘆息曰茫茫遠海  
何所投檄買酒劇飲醉卧小艇上起視則檄已換第  
書一醋字忠惠公曰神示我矣當廿一日酉時潮退  
可址也又二碑之石一粗一膩好事者復云外國夷  
人摹倣其書勒粗石上夜換戟歸此二事要屬齊東  
而近時有作皇朝列卿傳者又以移檄海神作蔡守

錫事亦不知何據也惟予同年都給事中劉弘實者  
洛陽里人爲余言幼讀書祠下嘉靖末有兵燹之變  
祠被賊燬碑離地四尺許石理橫裂斜倚石垣之上  
居久之忽自端正意有神物呵護此則所親見云又  
宋泉守三山林之奇手錄造橋一事其一云初造時  
石匠四至各呈其藝有獻石獅子者其髮玲瓏有條  
理又一人所獻其口閒處不容措手珠圓轉在口中  
殆不可測元豐八年轉運副使王子京圖橋以進朝  
命嘉賞橋之北亭榜曰洛陽之橋趙斡書又有亭曰  
濟亨趙不貽書也

祝穆方輿勝覽泉州萬安橋一名洛陽橋嘉祐間太守蔡君謨勸州民成此橋元豐初運使王公常進畫本天子嘉賞陳偁詩繪圖已幸天顏照應得元豐大筆褒謂此也

王世貞弇州山人槩萬安橋天下第一橋君謨此書雄偉道麗當與橋爭勝結法全自顏平原來惟策法用虞永興耳畫錦堂差近之荔枝譜不足道也

書畫跋君謨此記原係兩石嘉靖中遭倭患燬其半土人取舊本摹補之前一片仍舊刻也

蒼潤軒帖跋鄭杓子經著衍極取古今十三人謂公

書起五季之衰萬安爲摩崖之苗裔可謂確論蓋大書不難於矩矱而難於得天眞趣多今以此觀之只似作蠅頭小楷此固其過人者

金石萃編按福建通志萬安橋在泉州府城東北亦名洛陽橋皇祐五年郡守蔡襄建自爲記手書勒石橋下卽謂此碑也史傳蔡襄字君謨興化仙遊人仁宗朝累以樞密直學士再知福州徙知泉州距州二十里萬安渡絕海而濟往來畏其險襄立石爲樑其長三百丈種蠓於礎以爲固至今賴焉召爲翰林學士此記云明年春蒙召還京蓋卽召爲學士時也墨

池編稱君謨眞行草皆入妙品篤好博學冠絕一時  
周必大平園集稱蔡忠惠公大字端重沈著宜爲本  
朝法書第一洛陽橋記與吐谷渾詞皆大書之冠冕  
也然則萬安橋當南宋時已有洛陽之稱但不知何  
所取義而名洛陽未有人論及者

泉州府志洛陽江在晉江縣東北距縣二十里晉惠  
二邑界江也合晉江東北諸山康溪長溪留公陂陡  
門東入於海江上有橋名萬安橋

廣輿記

唐宣宗微

行覽山川之勝歎曰大類吾洛陽

圖書宋淳祐志引沈存中筆談云水以漳洛名甚衆

洛落也水落於下謂之洛舊號洛洋九域志作樂洋以落爲樂誤矣後人以洛陽名之而好事者云唐宣宗出家時至此謂風景類西洛則不根爲甚按宣宗嘗至同安夕陽寺西洛之說未必無據古識洛陽沙平泉南公卿則洛陽之名已古矣

萬安橋額

書史會要劉澤閩人善大字嘗書萬安橋三字在海石上徑三尺許有隼尾存筋之法時蔡襄造橋不自書澤書之

順清縣昭靈廟記

皇祐中

陳良撰

按良景祐元年特奏名甌甯人見郝志

集慶寺鐵井欄文

至和元年

寺在浦城北鄉永康里溪東欄圍一丈一尺徑面三尺七寸高二尺二寸其文曰大宋至和改元歲次甲午十二月丁丑臘十九戊申日弟子黃光并弟恕弟高弟度同發虔誠抽淨財備口鑄鐵井欄一口捨在口門市義井乞薦先祖章氏六娘口魂超生淨界謹題勸緣口街行者口口口義井第四口口人王口鎬記凡九十字分書

古田縣廟學記 嘉祐二年

邑令陳昌期撰

按昌期字世卿古田人嘉祐間知古田見黃志名  
宦郝志職官列入紹興間誤

歧山開并筦路井記 嘉祐二年

僧惟善惟坦捨錢開并筦路井宋嘉祐二年中元丁  
酉口志正書刻羅漢巖井邊石壁

連江縣建學記 嘉祐中

邑人周希孟撰

按希孟字公闕侯官人與陳襄陳烈鄭穆爲友號

四先生試將仕郎充本州教授三表力辭不許

連江縣朱公橋記

嘉祐三年

魯國曾撰

施元長等鼓山題名

嘉祐五年

宛陵施元長陽夏李宗孟嘉祐五年十月三日同遊

正書刻靈源橋

按元長字景仁宣城人天聖中進士與李宗孟並任

福建提刑

蔡襄荔枝譜

嘉祐五年

郝志凡七篇嘉祐四年襄製是譜明年書于泉山安

靜堂文獻通考晁氏曰皇朝蔡襄記建安荔枝味之  
品第凡三十餘種古今故事一卷陳振孫曰君謨爲  
此書且書而刻之與牡丹記並行閩無佳石以板刊  
歲久地又濕皆蠹朽至今猶存其家而字多不完可  
惜也

石墨鐫華此閩中刻刻手不佳而君謨正書猶有永  
興遺意蘇黃米三家不及也評者謂土偶蒙金誤矣  
燕度等鼓山題名 嘉祐六年

嘉祐辛丑歲七月十八日同寅僚遊鼓山登大頂峯  
憩靈源洞知福州燕度題通判錢防權僉判宋球東

川節度推官趙諮節度推官方子容觀察推官趙瑾  
正書刻靈源洞從左讀

按燕度字唐卿益都人嘉祐間知福州宋球酸棗  
人方子容字南奎莆田人皇祐五年進士通判僉  
判節度推官郝志並失載

### 劉若虛墓碣

蔡襄撰并書在福州馬鞍山

宋尙書屯田員外郎贈光祿卿劉公墓碣

公諱若虛字叔陽姓劉氏漢之衰楚元王子孫不去  
彭城歷魏晉以來彭城劉猶爲著姓至唐司徒晏以

雄材精智用轉流輕重之術於乾元上元之間飽國  
饑者二十年至宰相功名益顯晏兄暹爲汾州刺史  
治有聲稱生大理評事談經評事生左常侍濛常侍  
生吏部郎中埴自司徒以至吏部四世或居長安或  
在汾晉吏部生伎實公之曾祖考也爲鄂州節度判  
官湖南帥據其地自王兵四起乃以其孥循江入閩  
居泉州卒葬南安縣始爲閩人鄂州生文濟是爲祖  
考徙家福州閩王王審知以其女妻之卒官吏部郎  
中皇考府君諱甫閩亡事錢吳越王法自取所部以  
爲俸府君不入一錢逮王歸京師而其官屬大小皆

得仕府君以母老辭不就祿至今鄉閭稱其孝廉娶  
李氏生子九人公其次子也公嚴明有大畧始學見  
鈔錄集書如白氏六帖類卽麾去曰要當以法禁去  
之耳通五經大要摘其旨義以爲修身治官之用不  
苟爲利祿學也咸平五年登進士第授大理評事知  
温州永嘉縣遷上所爲文章眞宗皇帝尙儒每稱程  
自言者召中書試就遷寺丞知隰州溫泉縣移通判  
保定軍再遷太常博士通判洪州大姓胡氏子殺人  
以厚貲願老貧者代死舉郡爲之覆藏獄且成公曰  
被殺者年少壯強今囚瘠老豈能制其命躬劾之果

老貧者自賣以資其家於是捕棄胡氏子市出受錢  
代死者郡中驚伏瀕江民以漁爲生而土豪常半取  
之曰江食我田汝漁者吾田所也公按視奏除沒江  
田租縱民漁改尙書屯田員外郎知邵武軍其俗尙  
鬼而不醫平居殺牛聚飲侮欺善良喜鬪擊以氣力  
加人而得罪戮意愜不恨公至撤淫祠禁巫覡教病  
者藥朋醉羣鬪賊竊恃強寘於深法又治孔子廟收  
學者爲之開說孝弟之行尊獎賢節吏民刷故所爲  
而聽公之所以爲俗習大變年五十卒於官天禧三  
年二月十三日也其年九月八日辛酉葬福州懷安

越城里公以恩受其父之太子洗馬致仕祖母馮翊  
縣太君母潘源縣君夫人新鄭縣君贈工部侍郎潘  
吉甫之女淑慎有禮嬪於夫家承上以順睦衆以和  
終三十年人未聞其笑罵聲閨門之內肅然也及公  
卒愈自約以奉時祀勅諸子學遂以有成爲父爲母  
皆有稱問男四人長曰弇不邇勢利負奇自隱曰奕  
有大材智曰異以文學知名皆終尙書屯田員外郎  
曰戒未仕女適進士林孝伯某初與奕異爲同年進  
士奕嘗謂予言丁謂爲宰相私天下士必歸我乃得  
進聞公聲名欲得一見卽推進之公不肯往於是始

知公之所以立身也慶厯中余知福州州人言公事  
親親有疾輒不食酒肉居親側雖大暑中夕必嚴衣  
冠長幼內外皆有法度鄉人效之又知公之所以爲  
家也後爲轉運使至邵武邵武稱公廉平市人持物  
入厠舍以就善價屬官莫敢侵牟治事快於決疑靜  
於臨劇初若不更意慮及施下皆當理要守法不貸  
而民不敢怨又知公之所以爲政也是三者皆世人  
之所難者故悉書以爲法公以二子爲郎累贈光祿  
卿銘曰劉自漢文史載陳唐有管蕭晏其人厥材絕  
特持國鈞晏兄而下八世孫剛嚴明允惠在民蟠於

郡治屈所伸種施必獲後嗣振孰從考信惟隧文

按叔揚洪州邵武二事郝志人物門俱不載子四人郝志祇詳奕異遺其二殆未見此碣也

劉蒙伯墓碣

嘉祐六年

在馬鞍山蔡襄正書

宋故朝奉郎尚書屯田員外郎通判潤州軍州兼管內堤堰橋道勸農事上騎都尉借緋劉君墓碣文君諱奕名蒙伯其先漢唐以來世有顯人至祖考皆仕國朝考諱若虛尚書屯田員外郎贈光祿卿光祿之碑襄嘗銘之系次詳焉君天聖八年進士及第授

惠州推官疾不果行次調南康軍判官移知洪州武甯縣事改大理寺丞累遷尙書屯田員外郎厯知鄭之滎陽鳳翔府判官通判漳州潤州事以皇祐三年五月二十三日終潤年五十三明年正月二十四日葬福州懷安縣靈山鄉越城里許夫人陳氏封寶應縣君子康夫留夫岐夫女適韓昌國次明州慈溪令陳章其季進士林同君於文章要以理道爲得不苟聲律其論性情推明孔子之法尤非浮屠所傳力教於人開曉其路從之學者咸以吾道自愛久之貧無以生就舉進士中乙科喜曰吾不能時之文章恐不

復仕進今幸中第吾志得矣其在武甯民憲訟而易  
刑爲令者多嚴法以止之猶不能勝君雖細事爲盡  
心有兄弟訟者譬之親愛之理以感動之輒泣涕自  
咎引去刑省而民格慶厯中元昊叛陝西用兵韓丞  
相琦爲經畧使辟君鳳翔一道兵民劇事多倚君辦  
集連□□兵敗民窮乃上書朝廷言其兵所以敗民  
所以窮其畧曰陝西之要練兵運糧最爲首務其策  
皆未爲得都部署者上將軍之任也而無專制之權  
其偏裨才否不敢輒去留之軍無行陳之法見利輕  
進畏敵遽退所以每戰必敗偏裨不死上將之令士

卒不知什五之制其理豈有勝哉邊戍益多廩粟益  
廣轉運使職其事也今之轉運使皆以序進不計其  
能未更年歲屢遷易之文書凡目曾未能知其暇以  
民爲意乎一方之患內靡度支外輟兩川之賦調及  
天下關陝之民流離窮困而邊儲日窘不幸天下之  
患有大於此何以支乎蓋由轉運使不擇其才不久  
其任無所歸責也又言被邊宜募土人給其閒田使  
之自衛其境可以省費言數十條率多此類事格不  
報漳州漳浦有虔州民四百口入縣買官所賣鹽令  
捕之民因鬪拒遂鞠其私販而強捍其法應死囚多

繫久疫殍相屬君爲直其非私販而出其不鬪拒者  
坐法數十人而已君初仕顧天下事若無所爲而可  
辦歷官二十年所至施爲謀議多不能如其意然後  
知其不可以力爲也於是補吏南歸展省墳域緬然  
有退耕之志而未果也其終之歲予適過潤州君病  
漬以手書謂予曰吾止於此矣惟稚子是託既終歛  
無新衣囊無餘貲郡吏民集錢二百千以贖夫人辭  
焉歸葬於閩屋無室廬產無田園勤勞其家清節不  
渝夫人之力焉嗚呼十年之間康夫以學行自立又  
能請文永其先烈予旣悲之而又慶其有後也銘曰

文弊於詞在天聖初牽拘婉偶華調剽膚君於斯文  
本末扶疎世言性情淪於浮屠君爲中庸聖哲之樞  
經營萬務於時有需旣官於陝晝思夕圖條兵轉餉  
實完民瘼上書於朝事願之殊章有冤獄十百其徒  
辯處平治脫釋不辜最後丹陽聲問益敷齋終克明  
歸宅海隅父子兄弟次序不逾旣順以安斯其已乎  
嘉祐六年歲次辛丑四月十九日樞密直學士尙書  
禮部郎中莆陽蔡襄撰并書

圓縣湯院碑

嘉祐七年

郡守元絳撰

閩七

古吳興劉氏

按絳字厚之錢塘人嘉祐中知福州見圖經及郝志本傳失載

永福縣湫口通靈護境廟記 嘉祐七年

黃彝撰

按彝慶厯間知連江見郝志

建公使庫記 嘉祐八年

郡守元絳撰

古田縣甯境廟記 嘉祐

張彥博撰

按彥博嘉祐中知興化有善政見郝志

龍首澗 治平四年

三山志龍首澗許狀元將肄業之所治平丁未知縣  
陳清刻石大書龍首澗有讀書堂

按將字冲元閩縣人嘉祐八年進士第一謚文定  
陳清治平間知閩縣見郝志澗在閩縣東山

蔡公泉 治平

在泉州小烏石山半有蔡公泉宋曾公濟記密學蔡  
公所濬因名時至和二年也治平間令王克俊刻石  
見泉州府志

按郝志職官晉江縣嘉祐間有王克疑卽克俊脫

一俊字

重修築子城記

熙甯二年

許將撰在福州

平遠臺題名

熙甯二年

口轉運使張徽知軍州事程師孟權轉運判官湛俞

熙甯二年七月遊

按題名在閩縣于山正書張徽字伯常熙甯初知  
州事兼轉運使師孟字公闢熙甯元年知福州湛  
俞字仲謨閩縣人景祐中進士爲福州轉運判官

光祿吟臺石刻

熙甯二年

輿地碑目光祿書碑在侯官法祥院

郝志在閩山之支舊爲法祥寺宋程師孟以光祿卿知福州觴詠于此寺僧爲刻光祿吟臺四大篆今析入民居

按三山志熙甯二年程大卿師孟詩永日清陰喜獨來野僧題石作吟臺郝志未及引

鳳池題名

熙甯三年

提點刑獄沈紳招轉運使張徽知州事程師孟轉運判官湛俞遊鳳池賢沙會于安國熙甯三年十一月二十五日

按題名在侯官正書郝志提刑熙甯間有阮紳無  
沈紳疑阮是沈之譌

蔣之奇等題名

熙甯四年

熙甯辛亥六月晦蔣之奇穎叔張徽伯常登烏石絕  
頂

按之奇字穎叔宜興人嘗爲福建轉運判官以治  
辦稱尤孜孜人物嘗薦閩處士陳烈見宋史列傳  
張伯常熙甯初爲運使題名當在此時辛亥乃熙  
甯三年也

呂伯能等鼓山題名

熙甯四年

建安呂伯能然明徐大方冲道弟大正得之熙甯辛亥歲仲夏二十五日同遊正書刻喝水巖

按伯能慶厯六年進士時知閩縣事大方大正俱甌甯人大方通判汀州大正隱北山時稱北山學士

丁竦等鼓山詩刻

熙甯四年

丁竦沈紳蔡烈紹熙四年同遊作三言詩十一句詩云鼓巖巔頂峯特窮島夷類封域屏閩東拱辰北歲辛亥帝司赤竦紳烈從隋涉寧若華拊瑤極呵蜚靈蹴蹙脊披霄根殫目力高志仰深必惕謹其至惟古

則

按三山志作望州亭鼓山銘時丁知福州沈爲提  
刑其銘刻在峯頂之盤石初架亭於上後爲風所  
壞今字存通志旣列丁竦等詩刻續志又列望州  
亭鼓山銘分爲二殊失攷按丁竦以熙甯三年十  
二月知福州五年十二月再任八年四月召赴闕  
詩言歲辛亥帝司赤當爲三年六月也

閩縣題名記

熙甯四年

邑令呂伯能立

按伯能熙甯間知閩事見郝志

學堂記 熙甯五年

提刑宋道撰在福州

按道熙甯間任提刑見郝志

長樂縣求誨堂記 熙甯五年

邑令蕭竑撰

按竑熙甯中知長樂見郝志

石笋詩刻 熙甯五年

在邵武熙春山有天然石如笋形上刻宋二使君詩  
其一張紘詩其一張徹詩紘詩有雲藏雨意明還暗  
水激溪聲斷復來恨君不肯留千騎同折溪花對酒

孟徵詩有飛鳥影穿紅燭去寒蟾光落素琴來三數  
幸通溪畔路好尋僧相渡時孟皆佳句也閩書作天  
然石詩刻 欽定續通志編入熙甯五年

按絃寶祐間任邵武軍熙甯間知福州兼轉運使

虎頭巖記 熙甯十年

輿地碑目在將樂楊時撰

縣城之東南有虎頭巖者昔顯德間邑人設像於其  
中治金鏤木爲鐘鼓以警朝昏旁有隙地可以種藝  
稼穡僧之居此者足以衣食焉自熙甯以來旁之地  
爲漁利者所奪而僧之居是巖者無以濟朝夕遂棄

而之他其後亦莫有守者故巖之左右前後薪木者  
不禁剪伐陵踐竹木無有遺蘗於是巖之醜形如張  
口待哺聳據於東南之隅邑人不暇求葺熙甯丁巳  
封內有警市人惶駭之無一日安其居縣令吳侯來  
始爲之還定安集之而民復得其所及賊平閭巷父  
老用昔者之言以謂是禍也斯巖實召之遂聞于公  
請縣之僧可湛者使葺是堂於巖腹刻木爲像以鎮  
之所謂均慶禪是也復作亭于巖股以待往來之游  
觀者落成而僧可湛者求予文以志之乃爲之言曰  
物之廢興無巨細皆有數焉非人力之所能爲也窮

山川聚土石頑然無關於利害而謂能致禍福於百里之民豈其然耶蓋人之所欲完以葺于是者數實然也不然之如之何而人樂爲之也且盜賊之興其漸有故非一日矣肆凶怙力之民慢令侮禁相視以成俗其御之也在得其術而已使後之長是邑者皆如吳侯則彼之肆凶怙力者方將遁形隱跡之不暇尙安能病民哉使後之人無術以御之則盜賊之興有在矣斯巖者何與焉以步仞之虛而層軒疊徑雲煙杳靄之間幽崖寒蹬乃若繪畫遠至于井邑之繁谿山之秀環目而盡得之則又足爲游觀之美矣故

予因書其廢興之由以示往來者使觀之無惑焉

宿猿洞

并詩

熙甯

程師孟篆書在烏石山

按公關熙甯元年知福州築子城建學舍治行最  
東南民爲立生祠宋史入循吏傳按徐興公續筆  
精載宋寶元間閩縣湛俞字仲謀登進士累官屯  
田郎中志潔行廉年五十卽掛冠歸隱于烏石山  
之宿猿洞三召不起熙甯初運使張徽字伯常知  
州事程師孟字公闢時往訪之所倡和諸詩勒之  
石壁師孟與伯常會宿宿猿洞詩云雙塔和雲宿

翠屏

時神光塔石塔

夢魂千萬到禪扃還教畫手新添意

一簇林猿伴二星張微和云月上高臺雲滿屏洞  
門休喚夕陽扃巍冠不整跣趺坐秋楮爛斑數點  
星微又倡云洞天虛寂翠屏欬心跡蕭然萬物齊  
無奈宿猿嫌宿客夜深猶擁亂雲啼師孟和云更  
深應是枕雙欬思得華夔事業齊終爲清時難退  
隱出山甘被百禽啼師孟又倡云永感無心戀緡  
紳十年不起卧龍身一朝黃紙除書下八郡衣冠  
盡望塵熙甯元年十一月也越二年正旦又會宿  
猿洞詩云夜半春歸曉始驚鬱然佳氣入山亭千

門喜慶逢元日一座光華照使星難得同時傳壽

竿合將新句勒詩屏漁郎莫向遊人道洞口而今

盡不扁微和云入林休顧曉猿驚壽酒交持石外

亭刺史尊崇山卿月主人高隱少微星只因避雨

投松蓋屢爲障風夾橋屏

已下缺第八句上缺四子

限巖扁運

判某和云曉來人意

缺二字

驚

缺一字有三元

缺二字亭

凍酒點唇浮白蟻穠桃迷眼落紅星地名小酉神

仙窟天設湘陰水墨屏醞藉莫誇洞庭記移文休

勒北山扁師孟又宿猿洞餞仲謨云洞口車輪欲

去時江山風物動光輝不須猿鶴相驚恐自是君

王未放歸又書仲謨先人功德院云高門餘慶本  
光山不幸流離五代間今日太平家可樂郎君富  
貴錦衣還熙甯二年八月也右詩十首皆勒巖壑  
字畫徑三四寸端楷莊重師孟又篆宿猿洞三字  
徑三寸效李斯體怪石林立仲謀括爲二十五景  
不知何年廢爲叢塚其詩尙存予昔同謝在杭尋  
故址而錄之噫昔賢高隱之地厯有名公題刻委  
之蘂裡朽槲之間不能禁復實吾鄉先輩之不好  
事也

閩清縣遷創獄舍記

熙甯

邑令徐絳撰

按絳熙甯間知閩清見郝志

蓮花峯詩刻

熙甯

閩書在南安縣葵山宋熙甯中邑人戴枕刻詩云此石非頑石成因浩劫塵一蓮花不老過盡世間春今有亭曰不老蓋取枕詩

登科巖

熙甯

在惠安縣治登科山熙甯間邑令鄭清子勒石

案清子紹興間通判漳州軍州事見郝志

道山亭記

元豐二年

曾鞏撰有篆書道山亭三字在烏石山蟠桃塢

閩故隸周者七至秦開其地列於中國始併爲閩中  
郡自粵之大末與吳之豫章爲其通路其路在閩者  
陸出則阨於兩山之間山相屬無間斷累數驛迺一  
得平地小爲縣大爲州然而四顧亦山也其塗或逆  
坂如緣絙或垂崖如一髮或側徑鉤出於不測之谿  
上皆石芒峭發擇然後可投步負戴者雖土人猶側  
足不能進非其土人罕不躓也其谿行則水皆自高  
瀉下石錯出其間如林立如上騎滿野千里下上不  
見首尾水行其隙間或衡縮繆繇或逆走旁射其狀

若蚓結若蟲鏤其旋若輪其激若矢舟泝沿者投便  
利失毫分輒破溺雖其土長川居之人非生而習水  
事者不敢以舟楫自任也其水陸之險如此漢嘗處  
其衆江淮之間而虛其地蓋以其阨多阻豈虛也哉  
福州府治侯官于閩爲土中所謂閩中也其地于閩  
爲最平以廣四出之山皆遠而長江在其南大海在  
其東其城之內外皆涂旁有溝溝通潮汐舟載者晝  
夜屬於門庭施多傑木而匠多良能以屋室鉅麗  
相矜雖下貧必豐其居而佛老子之徒其宮又特盛  
城之中三山西曰閩山東曰九仙山北曰粵王山三

山者鼎趾立其附山蓋佛老子之宮以數十百其瓌  
詭殊絕之狀蓋已盡人力光祿卿直招文館程公爲  
是州得閩山欽盞之際爲亭於其處其山川之勝城  
邑之大宮室之榮不下簞席而盡于四囑程公以謂  
在江海之上爲登覽之觀可比于道家所謂蓬萊方  
丈瀛洲之山故名曰道山之亭閩以險且遠故仕者  
常憚往程公能因其地之善以寓其耳目之樂非獨  
忘其遠且險又將抗其思於埃壙之外其志壯哉程  
公于是州以治行聞旣新其城又新其學而其餘功  
又及於此蓋其歲滿就更廣州拜諫議大夫又給事

中集賢殿修撰今爲越州字公闕

案子固以熙甯十年知福州元豐元年赴召是記

爲師孟作林希書

莘老等鼓山題名

元豐二年

莘老德孺景述元豐己未歲季秋戊子日同遊正書  
刻忘歸石傍

案孫覺字莘老高郵人元豐元年以右司諫直集

賢院知福州

增學額記

元豐中

范曄撰在福州

長樂縣福安院記

元祐二年

林口撰闕名

方宙等鼓山題名

元祐四年

方宙子正之儀仲昭武吳表深幾道淮西播師中及  
之錢塘關景山彥瞻郡人張勵深道元祐己巳三月  
二十日同遊鼓山靈源洞漱湧泉而歸正書刻將軍  
石前

案方宙熙甯六年進士官轉運判官吳表深胡安  
國門人元豐二年進士關景山關魯子舉進士張  
勵永福人熙甯六年進士以集英殿學士知福州

錢公永等鼓山題名 元祐四年

錢公永雷子石潘及之管明善同遊靈源洞元祐四年七月上休林公濟題草書刻靈源洞

按公濟名積尤溪人熙甯間知福州

社稷壇銘 元祐六年

柯述撰在福州

或問社奚銘予謂祭主敬不敬如不祭社稷歲再祭所以爲民祈報而政莫先焉予土茲土視其壇地汚且隘不足以行禮廣而新之壇墼器宇靡不周備敢不以告于後之人於是勒銘於壇之東南烏石山之

頂前爲亭曰致養以其當州之坤焉銘曰后牧民天  
乃食惟社稷作稼穡風雨雷贊生殖叶時日祭有秩  
歲庚午夏率職卽坤維眡壇域地汚隘制匪式爰廣  
新古是則辛未春工告畢齋有廳器有室暘若雨事  
咸飭後之人敬無斁

通志在烏石山鄰胥亭西數武宋元祐中述知福州  
建壇爲銘今壇廢刻石存按訪碑錄作梅述撰王裕  
民正書在侯官元祐六年

案柯述字仲常南安人爲蔡襄所知以元祐五年  
知福州至七年四月赴召訪碑錄作梅述撰誤裕

民晉江人元祐間知邵武見郝志庚午爲五年辛未六年也

漳州登科記 元祐七年

輿地碑目 元祐七年

長樂縣元祐港碑 元祐

黃裳撰

縣之東南走三十里地曰湖東捍海畫塘爲田凡十八所熙甯中飛沙淤港積而成山溢水蓋田俄然成湖民率力導之而弗就三年又開白石湖有三沙合如故元豐四年周及等又開舊港終成復合元豐五

年有林迪等遂乞易田爲港意雖大而力不至八年  
節度使判官陳公毅貸官錢百萬鑿卓嶺借道陳塘  
由斗門而注于海方農事就功苗且秀矣利陳塘港  
者忌之因鑄斗門水不得泄陳公又乞因山爲埤增  
水爲湖易濱澗湖而作田以償被患之民故所忌者  
益衆紆迴沮難務息喧訟自是耕者息業散之四方  
所存無幾令尹袁公下車詢問其故亟請暫免二稅  
民畢受賜矣一日注視相地之勢以東南爲下西北  
爲高宜若可圖遂語民曰彼雖民田可倍價易以爲  
港或謂沙田多潰泉難于畚鍤請穿井試之公曰不

然先導下流泉自襲去豈若井之積也乎繼有周家  
建議鑿王埕由妙峯塘又易謝欽等田募鄭仕衡等  
合力以治不淹旬而港道平民且謠曰果如令尹之  
言非鑿井比也延袤三百四十五丈深二丈廣四丈  
伐石因岸爲橋肆輦石輒陷議者殫計莫知所出將  
廢公復往視易以八竇親督其役不數日就緒又於  
牛山下浚小港減殺高水以助之若夫時而暴注川  
流蕩搖行者相呼耕者失色曰吾之田且無漲溢之  
患者有竇以疏之有溝以殺之至若海風蕩薄怒濤  
奔湍若不可禦曰吾之田且無潰決之患者有竇足

以拒之也港成耕者雲集唯恐後時是歲乃復有秋  
困者乃甦亡者乃復且相語曰非令尹之力吾將操  
瓢囊爲溝壑中瘠矣尙何至是耶于是港外之地邊  
于海瀉滷不毛因湖水之浸滌悉爲膏腴諭民隄防  
而就有爲此又因其利而利之也嘗謂萬物之理順  
之斯易逆之斯難求之易而不求之難事有不然者  
歟古人之所能行其所無事者也夫知物而創之者  
智也知而不行未足爲果決物而繼之者果也決而  
不行未足爲勇惟知果勇公能具之故于作克濟蓋  
考其意謂書之八政以食爲首周官九職以農爲先

農而後穀理而後止爲政之急務也故嘗夙夜憂勤以共其事今有人于此享旦暮毫髮之利猶將嘆祝不已況乎收有餘積饑有餘給仰事俯育旣賴旦夕宜乎一方之人熙然相與立生祠於寺公雖去而民見之聊慰乃思公乃止之衆皆憮然後欲以公姓名港曰袁公港公曰不可此天子之功也宜以元祐名之

案冕仲浦城人元豐五年進士第一政和中知福州見郝志袁正規元祐間知長樂節度判官陳公毅志失攷

重修連江縣大中玉泉寺記

元祐

陳傳記

案傳皇祐五年特奏名建安人淳祐間任武平縣

見郝志

元祐黨人碑

元祐

在福州府學後詔燬

王若愚等題名

紹聖元年

王若愚陳彥聖文安國紹聖甲戌年季夏望日遊

案題名在烏石山

胡師文等武夷山題名

紹聖二年

建甯太守无畏居士胡師文敬造武夷換骨仙巖紹  
聖乙亥十二月張淨王華國同來幕賓王行可邑宰  
王當尉石景充後至刻崇安雲虛洞中

案師文紹聖間知建甯王當紹聖間知崇安並見  
郝志石景充攷

閩清縣廟學記 紹聖四年

鄭居中撰

案中宣和初會充祐神觀使見郝志

重建龍祠記 紹聖四年

訪碑錄危真撰會昇正書在龍溪

案危禎字逢吉臨川人淳熙進士會知漳州作龍江書院避諱作真會昇元符中任邵武縣見郝志

黃思道等題名

紹聖四年

黃思道溫禹弼紹聖四年八月二十八日遊神光寺

登鄰霄臺

增修學齋舍記

紹聖中

王祖道撰在福州

案祖道紹聖間任福州提刑司見郝志

會應廟禱雨石刻

元符元年

王應山閩都記會應廟舊爲靈廟相傳閩時建宋皇

祐中邑人以旱禱樹雨大至紹聖四年郡守溫益修  
之元符元年功成冬大旱守率僚屬于廟讀祝未畢  
雨隨集命侯官尉王壽刻石記之

案溫益紹興四年任福州王壽元符間任侯官縣  
尹見郝志

金粟臺題名

元符三年

提舉常平江公著轉運判官檀宗旦通判軍州事吳  
亮提點刑獄程遵彥元符庚辰十月十八日同遊九  
仙萬歲寺登金粟臺正書在于山

按公著元符中任提舉常平茶鹽事宗旦元符間

任轉運使遵彥元符間任福州提刑見黃志吳亮  
仙遊人曾任建甯府見閩書其官通判軍州志失  
攷

汪公著等道山亭題名 元符三年

桐廬江公著晦叔池陽檀宗旦之美三衢吳亮君采  
鄱陽程遵彥之邵同遊神光寺登道山亭元符三年  
十月十七日正書刻烏石山沖天臺

程遜彥等鼓山題名 元符三年

程遜彥三衢吳敷葉沃溫陵許人朱敏元吳千元符  
庚辰十月遊鼓山靈源洞正書刻靈源後

按葉沃時知安溪縣事朱敏元字光道治平四年  
進士官朝請大夫時知同安縣事吳千字無求閩  
縣人熙甯六年進士時知興化縣事

桂籍堂進士題名記

崇甯四年

輿地紀勝崇甯四年郡守郭重建勒石紀皇朝至道  
以來郡進士題名置堂上軍學教授胡份序之後宣  
和七年郡守廖剛立石續記

按在莆田

葉彥成等于山金粟臺題名

崇甯五年

葉彥成喬叔彥章叔虎朱知叔同遊崇甯五年人日

正書在閩縣

按彥成名棣哲宗朝以朝請大夫知福州見萬姓  
統譜

喬世材等烏石山題名 崇甯五年

崇甯五年二月癸酉提點刑獄喬世材提舉學事朱  
英知郡事葉棣同遊烏石山諸口與會食橫山閣晚  
歸行書在侯官

按世材崇甯間任福州提刑司見郝志

需老等鼓山題名 大觀三年

大觀己丑仲秋丁酉需老開堂師座邀部使者俱至

四司僚佐預者六人公翼全叟君舉子震同登大頂  
峯正書刻大頂峯石

案需老卽有需莆田陳氏子得法於乾公部使者  
陳覺民延住福州鼓山後退居石門見宋詩紀事  
此題名云開堂師座正覺民延住時也覺民以崇  
甯四年知福州大觀二年二月自泉州移任福州  
提刑君舉陳偁字元豐五年知泉州

王氏石銘

大觀

輿地碑目洪邁夷堅志邵武危氏在大觀二年葬其  
親於郡西塔院旁踰月雨過視墳側有痕握之得銀

杯二銅水缶及鏡銘一又得銘石其文曰瑯琊王氏  
女江南熙載妻丙申閏七月葬在古城西諸器皆依  
古式制度精巧非世工所及

名勝志在邵武金鰲山

天香臺 大觀

閩都記在侯官洋坑宋大觀中有孝子焚香祝親於  
此書天香臺三字於石有頌四句

太史溪石刻 政和元年

閩書在沙縣太史溪石刻云馬小十一乘五字又倒  
刻云政和元年十二月二十八日記

重修忠懿王廟碑 政和元年

殿撰羅畸撰在福州

按畸大觀三年以朝請大夫集賢殿修撰知福州  
政和元年命雪峯太平主僧重修畸自爲記云過  
忠懿王祠嘆其陋甚竊自怪曰浮屠氏好談因果  
以勸世而忠懿喜營塔廟其功德在佛之徒爲多  
若使反其所施以治其廟像是使浮屠氏之說益  
信也聞雪峯太平主僧足以任事乃諭之閱月而  
成見三山志

修崇順王廟記 政和二年

懷安令吳興撰在福州

按輿晉江人大觀間知懷安郝志作吳興誤

社稷壇記

政和初

龍圖孫畸撰在福州

按畸政和間任福州都督府知州事

金粟臺題名

政和二年

□□□平等事長沙何□□直浩然走□□□公事

大梁張□君兼知政事□□□□人□□□□□同

登金粟臺政和壬辰□□

廓然臺

政和四年

梅川陳賜命名賜紫釋鴻份書政和四年仲春任國  
明□□上石

按在于山正書

黃冕仲等鼓山題名

政和四年

延平黃冕仲郡陽齊亨仲武夷黃安仁政和甲午九  
月二十五日同遊正書刻將軍石左

按冕仲時知福州齊之禮字亨仲弋陽人元符中  
進士官監察御史黃靜字安仁浦城人元豐五年  
進士

陳紹夫等鼓山題名

政和五年

陳紹夫邀韓符會昂許紘遊鼓山姪建嘉會男祖澤  
姪孫森侍行政和五年三月十一日正書刻鼓山

李景武夷山詩刻

政和七年

政和丁酉古鄧李景來貳府事瓜期俯仰因過武夷  
遊換骨巖瞻禮聖跡久之漫書一絕以紀其實區區  
三載抗塵顏拙直無由脫謗議今日捫蘿叩仙室願  
將凡骨換雲山庚子六月十二日正書在崇安雲虛  
洞

太原石刻

政和

在永福十一都石壁有詩僅存二字

閩都記唐大和中縣令王君官滿歸邑人留餞夜半  
未抵舟其室人題詩於石壁曰何事潘郎重別筵君  
心未斷妾心懸太原山下相思處猿叫山山月滿船  
宋政和中縣令陳武祐刻詩于石年久磨刻惟太原  
二字尙存輿地紀勝作太原灘留題陳武休後序云  
永福太原灘有太原二字不知何代人書

按武祐莆田人元符三年特奏名曾知永福見郝  
志

閩中金石志卷七終